

司馬文正公傳家集卷第七十九

後學桂林陳弘謀重訂

碑

河東節度使守太尉開府儀同三司潞國公

公先廟碑

嘉祐二年作

先王之制自天子至于官師皆有廟君子將營宮室宗廟爲先居室爲後及秦非笑聖人蕩滅典禮務尊君卑臣於是天子之外無敢營宗廟者漢世公卿貴人多建祠堂於墓所在都邑則鮮焉魏晉以降漸復廟制其後遂著於令以官品爲所祀世數之差唐侍中王珪不立私廟爲執法所糾太宗命有司爲之營構以恥之是以

傳家集卷七十九 碑

唐世貴臣皆有廟及五代蕩析士民求生有所未遑禮類教墜廟制遂絕宋興夷亂蘇疲久而未講仁宗皇帝閱羣臣貴極公相而祖禰食於寢儕於庶人慶曆元年因郊祀赦聽文武官依舊式立家廟令雖下有司莫之舉士大夫亦以耳目久不際往往不知廟之可設於家也皇祐二年天子宗祀禮成平章事宋公奏言有司不能推述先典明諭上仁因循顧望遂踰十載緣偷襲敝殊可嗟憫臣嘗因進對屢聞聖言謂諸臣專殖第產不立私廟睿心至意形于歎息蓋由古今異宜封爵殊制因疑成憚遂格詔書請下禮官儒臣議定制度於是翰林承旨而下共奏請自平章事以上立四廟東宮少保

以上三廟其餘器服儀範俟更參酌以聞是歲十二月
詔如其請既而在職者違慢相仍迄今廟制卒不立公
卿亦安故習常得諉以爲辭無肯唱衆爲之者獨平章
事文公首奏乞立廟河南明年七月有詔可之然尚未
知築構之式靡所循依至和初西鎮長安訪唐廟之存
者得杜岐公舊迹止餘一堂四室及旁兩翼嘉祐元年
始做而營之三年增置前兩廡及門東廡以藏祭器西
廡以藏家譜齋枋在中門之右省牲展饌視滌濯在中
門之左庖廚在其東南其外門再重西折而南出四年
秋廟成公以入輔出藩未嘗踰時安處於洛元豐三年
秋留守西都始釁廟而祀焉一旦授光以家譜曰予欲

傳家集卷七十九

碑

二

志族世之所從來及廟之所由立垂示後昆而爲我叙
其事歎于石光竊惟公追遠復古率禮興化之盛德不
可以無傳雖自知不文不敢辭謹叙而銘之按譜云文
氏之先出陳公子完以謚爲氏與翼祖諱同至秦有丕
丕生河東太守教始家平陽其後有韶漢末爲揚州刺
史自韶以來世乃可譜韶之六世孫頻爲後魏北絳太
守頻曾孫顯雋以別駕從北齊高祖起晉州就霸業戰
功居多終兗州刺史頻之六世孫曰肅曰君洪肅仕隋
爲潁川郡丞名列循吏以公直抗宇文述老卑秩君洪
從高祖起晉陽爲右衛將軍太子建成餘黨攻宮門君
洪首奮挺出戰沒頻之八世孫曰暉曰播暉相中宗諱

張易之奪武后天下歸之唐用仇人讒謫死嶠南播有
史學官至給事中君洪之曾孫羽為御史中丞肅之四
世孫括為御史大夫括孫晦為太子賓客晦兄昕為義
成節度使皞為散騎常侍榮冠當時自顯儁至晦皆有
傳見於史其家自平陽或遷太平或遷蒲阪或遷寶鼎
晦之從父昆弟晤為北都留守判官始居介休晤生汾
州參軍榘榘生館館生澤州錄事參軍即公之高祖考
也諱洺曾祖考諱某仕後唐歷晉城天池平城三主簿
避晉高祖諱更其氏曰文歷寧太谷二令漢高祖即位
復舊氏更名某漢失天下其支別者自帝於晉陽復事
之終嵐州錄事參軍祖考諱某辟石州幕府弃官歸鄉

傳家集卷七十九

碑

三

里太宗皇帝平晉陽名之不起以廟諱故復為文氏考
諱某以儒學進歷十三官所至以彊直勤敏振利攘害
名聞達不可掄判三司開拆磨勘司終主客郎中河東
轉運使其治行之詳見於故平章事晏公參知政事王
公沂譔墓誌及碑公貴朝廷褒榮三代贈官皆至太師
中書令兼尚書令爵燕周魏三國公廟成澤州府君為
第一室夫人某氏配燕公為第二室燕國太夫人宋氏
配周公為第三室周國太夫人王氏越國太夫人申氏
配魏公居東室魏國太夫人耿氏魯國太夫人申氏配
公以廟制未備不敢作主用晉荀安昌公祠制作神板
采唐周元陽議祀以元日寒食秋分冬夏至致齋一日

又以或受詔之四方不常其居乃酌古諸侯戴遷主之義作車奉神板以行此皆禮之從宜者也其銘曰

鬱彼喬木茂于芑根浩彼長川發于浚源矧人之先云誰敢諼天佑有宋誕生哲臣有幹樞軸乃秉鎔鈞克釐克諧允武允文甘陵有妖悖暴紛囂公往逍遙不日而消仁祖構疾羣心震栗公入密勿四海清謐出殿方維爲諸侯師以惠以綏不廢其威至也民悅去也民思其思如何式謠且歌歌政之和在洛爲多謀居之安疇如得公自汾渚遷于洛潞允樂茲土永燕私處伊水洋洋山木蒼蒼是掄是劇是斷是斲達于有洛是相是虞是卜是諏是築是揀是植是扶是茨是塗作廟渠渠新

傳家集卷十一

九碑

四

廟旣成室家是營公曰予居風雨是憮勿侈勿崇予躬是容人庠公堂公曰子康人隘公庭公曰子寧人勿子隘維子孫是賴人勿子痺維子孫是利克恭克儉子履子視俾躬之爲美匪目之爲麗廟堂旣闢四室有侑豢牲孔碩導黍及稷豆籩旣滌汎掃旣備旨酒旣沛牲爲饁乃薦乃陳苾苾芬芬祖考欣欣百嘏來臻天錫公社彊明壽愷帝錫公祿崇榮豐泰天匪公私公德是宜帝匪公勲是疇公拜稽首揚天子之休思純終始式詒孫子子孫孫勿替勿忘時奉烝嘗保公之烈光

戶部侍郎周公神道碑

治平四年作

周以國爲氏漢魏以來世有顯人公之先家於益都會

祖考諱仁貴不仕祖考諱子元舉三禮登科爲深州司
法參軍契丹覆深州舉室罹禍朝廷哀之贈大理寺丞
祖妣田氏追封仙遊縣太君考諱圭時適在外得免朝
廷賜以官終太子中舍累贈尚書左僕射妣李氏累封
常山縣太君公諱沆字子真舉進士一上中第除膠水
縣主簿初試吏事精敏如素習上下稱其能徙諸城主
簿用蔡文忠公薦遷鎮海軍節度推官知勃海縣濱州
大吏恃府勢築室鄣民居害其出入民訴縣以十數前
令莫敢直公立表撤室收吏抵罪豪猾惕息歲餘召入
改著作佐郎縣民詣轉運使杜祁公請留祁公爲奏詔
許之會公以母老疾求監青州稅尋以憂去職服除知

傳家集卷七十九

碑

五

嘉興縣趙元昊擾西陲詔近臣舉可通判陝西諸州者
富丞相時知制誥以公名聞擢通判鳳翔府以權發遣
鹽鐵判官召還改江西轉運判官公固辭願得近鄉里
一官以謀葬乃改知沂州過京師入對言事仁宗善之
賜服銀緋到官數月召還爲開封府推官俄遷判官會
湖南蠻唐盤二族殺掠居民官軍討之數不利有詔本
路遣人招撫蠻輒殺之乃以公爲轉運使委之經畫辭
行仍服金紫公至上言蠻驟勝方驕未易懷服宜須秋
冬進兵擊之蠻地險氣毒其人驍悍善用鉞盾北軍不
能與之確請選邕宜融三州澄海忠敢知其山川習其
伎藝者三千人入擣巢穴餘兵絡山足出則獵取之俟

其勢窮力屈然後可招撫也朝廷用其策二族皆降湖
南遂平是時軍旅暴興運路險澀公隨宜區處資糧豐
給而民不疲病名爲度支判官行未至復加直史館知
潭州兼荆湖南路安撫使先是北軍戍湖南山路者或
暮年或再暮乃代去再暮者多死瘡痍公奏以爲不均
請皆以暮年爲斷所生全甚衆歸朝除河東路轉運使
自慶曆以來河東行鐵錢民多盜鑄吏以峻法懲之抵
罪者日繁終不能禁公乃命高估鐵價盜鑄者無利不
禁自息入爲度支副使儂智高寇掠廣南旣敗走詔以
公爲西路安撫使天子以嶺南地惡命公非賊所殘州
縣不必往公曰天子之命至仁也然遠民新罹荼毒余

敢不究宣天子之澤以面慰之乎遂徧行州縣雖窮僻
無不到者民避賊多棄田里遠去吏以常法滿半歲不
還者皆聽人占佃公曰是豈與凶年逃租役者同乎奏
更延期一年召使復業有已爲人占佃者皆奪還之仍
免其一年租三年役貧者縣官貸以種糧由是嶺南民
復安集又奉使契丹還加天章閣待制爲陝西都轉運
使未幾改河北初河自橫隴西徙趨德博後十餘年又
自商胡西徙趨恩冀朝廷皆以功大遂不復塞有李仲
昌者建議請自商胡口下鑿六塔渠引河東注橫隴故
道用功省而利大詔遣使者與公行視利害公上言國
家近議塞商胡計用薪蘇一千六百四十五萬役工五

百八十三萬今仲昌奏塞六塔計用薪蘇三百萬共是一河其塞之工力不容若是之殊蓋仲昌故爲小計以求興役殆非事實又即日河水廣二百餘步六塔渠廣四十餘步必不能容且橫隴下流自河徙以來填闕成高陸其西隄粗完東隄或在或亡前日六塔水微通分大河之水曾不及十分之三濱水之民喪業者已三萬餘戶就使如仲昌言全河東注必橫潰汎濫齊博德棣濱五州之民皆爲魚鼈食矣今自六塔距海不啻千餘里若果欲壅河使東宜先治水所過兩隄使皆高厚仍備置吏兵分守其地多積薪蘇以防衝決乃可爲也然其勞費甚大恐未易可辦以臣度之六塔實不可塞朝廷卒用仲昌議塞之旣塞不終朝復決齊博等州果大被水害朝廷乃竄仲昌於嶺南諸阿附其議者亦抵罪衆始知公議爲是公又上言民罹水災皆結廬隄冢糧乏可哀臣欲輒發近倉賑之顧大恩當自上出臣不敢竊取爲名願亟遣使者案視收恤之朝廷從之未幾徙河東都轉運使踰年遷龍圖閣直學士知慶州兼環慶路經略安撫使邊民多闌出塞販青鹽抵重法公請損官鹽之價犯者稍衰入判三班監兵部太常寺通進銀臺司仁宗山陵爲鹵簿使又以遺留物奉使契丹公以二使皆有厚賚不欲專之因託以力不能兼辭使契丹不行士大夫美之英宗初即位契丹遣使賀乾元節公

爲館伴詔取書入置樞前使者固請見上曰取書非故
典也上以方衰經不許使者執書不肯授閣門公曰昔
北朝有喪南使至柳河而還今朝廷重鄰好聽君前至
京師達命於先帝恩禮厚矣奈何更以取書爲嫌乎使
者立授書是時朝廷未知契丹主之年公從容雜佗語
以問使者使者出不意遽以實對旣而悔之相顧愕眙
曰今復應兄事南朝矣頃之遷樞密直學士知成德軍
兼眞定府路安撫使土俗多棄親事浮圖公案籍閱其
不知法者皆斥還其家凡斥數千人在眞定數年以疾
辭位治平四年以戶部侍郎致任其年八月丁未朔薨
於公家年六十九公爲人莊重動止皆有法不妄笑語

傳家集卷七十九

碑

八

居家孝友甚至而當官謹嚴始終如一鉅姦衛良摧彊
撫弱去嘉興二十年人有過其縣聞民間猶思咏之以
爲前後無有罷潭州民遮道不得行公諭解不能却乃
旋鞭而南曰當與汝歸耳衆喜奔呼爭先道稍開躍馬
北去追至境者尚數百人與僚佐議事其言當者立從
之不當不面斥其短徐曰某意欲如此爲安衆亦不能
易也所部屬有罪先以好言諭之不變乃誚責之懼而
自改者蓋十七八苟尚不變乃案致於法猶爲虧除不
盡繩也有死於官下其家孤貧不能自歸者必爲贖斂
衛送或無歸者則爲存處立生業嫁其女誨其子弟視
如親戚故人始望其貌皆慄然畏之久而求其心乃知

實仁厚長者也先娶王氏再娶劉氏封彭城郡君皆先公即世三男莘將作監主簿百藥大理寺丞常大理評事二女適太常博士榮安道來安令江懋簡公薨之歲十月已酉葬於先塋百藥暨常欲刻碑臨道俾異日鄉人皆得瞻公之墓不忘公之德請館閣按勘梁君燾狀公之功行以授光命爲之銘光昔通判并州事事公於河東雖自知無文不敢終辭銘曰

古之君子德盛道尊望之儼然即之也溫公正衣冠嚴不可干施之於政乃仁乃寬吏畏而悛民思不諉欵銘垂美以告後昆

行狀

傳家集卷七十九 碑行狀

九

故處士贈都官郎中司馬君行狀

曾祖 林祖 政 父 炳 皆不仕

君諱沂陝州夏縣涑水鄉高墦里人其先出於晉安平獻王至征東大將軍陽始葬於河東安邑涑水之南後魏孝文帝太和中分安邑爲夏縣遂爲夏縣人自唐以來仕宦陵夷降在畝畝然累世兄弟未嘗異居故家之食口甚衆而生業素薄無以贍之君幼而孝謹諸父兄悉以家事委之君於是治田疇繕園圃修闌笠完園倉雖有傭保必以身先之使莫敢不盡力者夜則側板而枕之寐不熟輒寤寤當是時田不加廣而家用饒又未嘗爲商賈奇袤之業一出於田畜而已諸父兄皆醉飽安

佚而君無故不親酒肉遇鄉人之匱乏者或解衣以濟之年三十二以景德三年十二月丙子終於家某年月日葬於南原待制府君常嘆曰自吾兄之亡而家遂貧豈所以資生之具減於昔日勤惰不同而已矣嗚呼使天下之民皆若吾兄之為雖古治世何以加惜其無位而才不大施也夫人李氏同里人年二十八而寡二男詠里及一女皆幼詠女尋又卒父母欲奪其志夫家尊章亦遣焉夫人自誓不許惡衣蔬食躬執勤苦使里之四方就學姑李氏老且病常卧一榻扶然後起哺然後食夫人左右就養未嘗小失其意如是積年以至於沒無懈倦之色既而里登進士第迎夫人之官夫人自幼未嘗與其母別至是思慕成疾久之方愈里累遷為尚書都官郎中歷典數州贈君官至尚書都官郎中夫人封永壽縣太君夫人為人慈柔勤儉中外宗族咸慕仰之始終一無間言子為二千石極其榮養年八十三以嘉祐五年九月甲寅終於京師其年十一月壬寅祔於君之墓光不及事君而及事夫人故得書其聞見之實以請於今之德行文辭為人信者以表其墓庶幾傳於不朽而子孫有所法則焉謹狀

墓表

贈比部郎中司馬君墓表

天聖元年作

兄諱某字嘉謨陝州夏縣人其先宗支所自出見於祖

墓碣曾祖諱某祖諱某父諱某皆不仕兄爲人謹厚孝於親友於兄弟自幼及長無子弟之過不幸生二十八年以天禧四年六月辛卯終於家夫人同縣王氏進士禹之女王長男未名而天次男京生未踰歲而兄沒夫人年尚少自誓不嫁京旣長以叔祖天章府君蔭入官爲人彊直幹敏所至吏民稱之由是累遷尚書駕部員外郎通判潞州軍州事贈兄官至比部郎中夫人享榮祿之養幾三十年封福昌縣太君年七十九以熙寧三年七月壬寅終二女長適鄉人曹中立早卒次適進士宋輔始兄之沒光生二年矣故於兄之材行不能詳知然苟非兄力爲善於其身而無祿安能有遺福及其後邪

傳家集卷七十九

墓表

十一

兄以天聖六年三月乙巳葬於先塋及夫人之沒以其年十月辛酉祔于兄墓京懼歲時之久不可以莫之識也泣請於光爲之表

贈衛尉少卿司馬府君墓表

慶曆二年作

府君諱浩於司徒公爲從父兄其鄉里先世見於祖墓碣曾祖諱某祖諱某父諱某皆不仕府君少治詩以學究舉凡八上終不遇遂絕意不復自進於有司專以治家爲事爲人魁岸慷慨尚氣義於宗族恩尤篤司馬氏累世聚居食口衆而田園寡府君竭力營衣食以贈之均一無私孀婦孤兒皆獲其所凡數十年始終無絲毫怨言家貧祖墓迫隘尊卑長幼前後積若干喪久未之

葬府君履行祖墓之西相地爲新墓稱家之有無一日
悉舉而葬之弟子里早孤府君識其儻異自幼教督甚
嚴其後卒以文學取進士第仕至太常少卿所至著名
迹前此鄉人導凍水以溉田利甚博歲久岸益深峭水
不能復上田日磽薄將不足以輸租府君帥鄉人言縣
官始請築塌於下流水乃復行田間爲民用至于今賴
之天聖八年四月癸巳終於家年六十三慶曆二年八
月癸酉葬西墓初娶張氏早終生女適解人南公佐公
佐舉進士得同學究出身再娶蘇氏先府君十年終年
五十八生男宣又娶郭氏無子後府君十六年終年若
干宣用司徒公蔭補郊社齋郎累官爲尚書駕部員外

傳家集卷七十九 墓表

十一

前知梁山軍令致仕居家駕部君寬厚有守練習法令
善爲政吏民不能欺既升朝累贈府君官至衛尉少卿
夫人蘇氏追封長安縣太君駕部君謂古君子必論讓
其先人之美著諸金石故命光直叙其實以表於府君
之墓道時熙寧六年五月辛酉也

哀辭

石昌言哀辭

眉山石昌言年十八州舉進士倫輩數百人昌言爲之
首聲振西蜀四十三迺及第及第十八年知制誥又三
年以疾終嗚呼少而秀宜其速成返齟齬不進晚而達
宜其壽又未老而終天道幽遠真不可得而識邪昌言

爲人純素忠謹望之儼然以律度自居卽之恂恂溫厚
善談笑令人心醉不能舍去光爲兒始執卷則聞昌言
名已而同年登進士第與昌言遊凡二十年自始得見
至於永訣其間迭有進退窮通相遇如一日旣不可得
而親亦不可得而疎也詩云淑人君子其儀一兮其儀
一兮心如結兮昌言之謂邪於未沒數日光往見之起
居固無恙一旦有人告曰昌言去夜得疾甚急未及問
訊又有繼至者曰昌言沒矣嗚呼死者人之常善惡脩
短固不敢言何奪之之暴也前年光自晉陽歸昌言延
我於中堂酌滑臺暑釀以飲我及往奠於畫像之前則
依然昔時置酒處也嗚呼誰能睹是而不慟也哉迺爲
之辭曰

傳家集卷七十九

哀辭

十一

嗚呼昌言天旣賦以純美兮胡有德而不年榮祿何後
兮零落何先幾日不見兮邈然九泉士喪師友兮國亡
俊賢綠耳顛躓兮輿璠棄捐冥冥不可求兮杳杳不可
追獨行過門兮怆焉自疑車馬不見兮遠行何之忽思
長逝兮涕下交頤寒暑回薄兮宿草離離哭也有終兮
忘也無時

司馬文正公傳家集卷第八十

後學桂林陳弘謀重訂

祭文

秦龍廟祈雨文

年月日宣德郎將作監主簿權知韋城縣事司馬光謹
率吏民具清酌庶羞之奠致祭于秦龍之神昔者聖王
設官分職畜擾神物以爲人用後世喪業神寔繼之知
龍嗜慾服事夏后王嘉神勞胙以此土歲祀趨忽廟貌
仍存闔縣奔走春秋薦獻却災致福保佑斯人今大夏
將盡而歷時不雨穀苗槁死不可復殖倉廩無儲民將
何恃民實神主神實民休百姓不粒誰供神役邑長有
罪神當罰之百姓無辜神當愛之天有甘澤龍實司之
以時宣施神寔使之槁者以榮死者以生旱氣消除化
爲豐登然後自邇及遠粢盛牲酒以承事神永永無斁
伏惟尚饗

祭齊國獻穆大長公主文

爲兩制
諸公作

惟靈襲慶皇家作嬪佞族環珮爲節動顧禮文蘋藻必
親無違婦職永夫以順教子以慈純素柔嘉自忘王姬
之貴肅雍明智居爲戚里之規嗚呼遐福未終大期奄
及去白日之昭晰歸下泉之窈冥宸極惋傷具儻增歎
祇陳薄薦庶達菲誠尚饗

祭郭侍讀文

維皇祐四年五月壬子尚書屯田員外郎孫琳殿中丞
司馬光太子左贊善大夫李端卿大理寺丞李杲卿前
通州推官楚楷謹致祭于故侍讀學士郭公之靈嗚呼
惟公之德清夷純白恪慎匪懈勤劬朝夕文為國華行
為士則抱牘拱編雍容帝側貧錫之金坐命之席絕衆
逾倫恩輝備極如何不淑奄從窳窳某等庸蔽久沐公
恩承乏下僚從公外藩庇其闕遺誨之語言如妣如甥
心何敢諉今茲相顧失涕來門瞻望靈帷薦其蘋蘩淒
風爾然髣髴如存嗚呼哀哉尚饗

祭范尚書文

以下二篇為
兩制諸公作

嗚呼天生雋賢為國之紀服休服采以翼天子冠帶立

傳家集卷八十 祭文

二

朝正色嘖嘖謙言直節奮不顧已迺率西師氏羌率俾
迺贊公台緝熙物軌乃牧東夏刑清政理德寔光大才
則茂美宜其永齡享有多祉如何不淑遠塗中止輜車
過都頓舍甚邇奠不手觴慙洞何已靈底其哀歎茲馨
香尚饗

祭觀文丁尚書文

惟公抱潔懷真含忠履厚賦才茂美逢世休嘉降集帝
庭回翔禁署羽儀髦雋黼黻訓辭登贊機衡進參台鼎
物無疵癘民底乂安陪侍殿帷雍容風議老成之德中
外式瞻宜享永年以毗大業如何不淑隕此哲人日月
有時輜車首路興言僚舊哽涕無從薄薦醪羞式歆哀

欵尚饗

諸廟祈雪文

竊以雪霜不時神寔職之編室流亡吏當坐之今者自秋徂冬天澤未泱麩麥旣寡又將槁枯意者吏不職與民無告歟胡爲困苦使至此極也惟神哀民之窮寬吏之辜使雪以時降而麥猶有收敢不牲酒鼓舞以承神休尚饗

祭黃石公文

維年月日具官某謹遣某官某敢以香酒告于黃石公之神惟公稟天至靈與聖同契幽贊人傑光啓漢家廟食于今千有餘祀惟是鄆土居神宇下曠冬無雪宿麥

傳家集卷八十祭文

三

將枯舊廩旣罄新場無望老穉遑遑瀕于溝壑上聖夙夜苦心焦思中外百吏憂愧失圖惟神導天之和寬上之慮救民之死赦吏之罪使膏澤下濟土脈憤興回枯爲榮變凶成稔敢不祇率所部遠邇之民以承事神永永無斃尚饗

祭劉大卿文

爲始平公作

維年月日具位某謹以清酌庶羞之奠致祭于同年留臺大卿之靈昔與羣雋同登帝庭曄如春葩雜然秀發歲陽四浹零落幾盡如何茲者又隕伊人惟君資性純和雅尚恬漠委蛇繁要雍容外臺維汶之陽寔爲故里聞者相遇觴咏甚歡華軒西征遠送于野轍迹未滅遽

以喪歸永言痾嗟情何能極薦奠雖薄歆茲至誠尚饗
諸廟祈雨文

間以早暵病于稼穡得請于神貺之甘澤來麩以登民
以粒食荷神之休永久無極今茲禾黍尚穉菽麥未孰
土壤已槁霧潤無繼川澤將涸螟或方熾婦子遑遑憂
猶未艾神宜監民之窮憫物之沴沃灑嘉生導迎和氣
庶幾豐穰克終大惠敢不鼓舞以承神事尚饗

諸廟謝雨文

間以早暵有謁于神神享其衷錫以嘉雨雖高下未泮
遂邇未均田畝小瀉民意差緩蒙神之惠不敢寧居選
牲潔酒亟伸報塞惟神嗣降豐澤克終顯德尚饗

晉祠祈雨文

傅家集卷八十一祭文

四

蓋聞誠通無遠神監無幽始謂不然迺今知信屬者時
雨稍乏宿麥未滋躬謁巖祠默伸心禱回輶再宿嘉澍
響臻豈懇欸之微克留神聽實元元之幸宜蒙神福然
原陸久燥根荻未泮畎畝喁喁猶有待望謹以清酌嘉
薦荅揚神惠神當茂布優渥以終大施尚饗

祭晉祠文

維年月日具官某謹遣某官某謹以醪果殽羞恭薦于
某神惟神宅晉之原食晉之土凡在晉境皆為神宇今
嘉澤雖豐露潤未溥神心無私民靡不撫遠邇之間奚
有捨取惟神申大前德均錫靈雨實我來麩秀我稌黍

穗棲于田粒益于庾爲酒爲醴永承神祐尚饗

晉祠謝晴文

久雨不止涉于積旬汙邪旣滯平原將溢田恐蕪穢民
憂墊隘有司恐懼謀請于神聰明感通遽已晴霽水返
其壑雲歸于山蔬穀無虧歲則大熟蒙神之休敢愛牲
酒尚饗

祭雷道矩文

維年月日陝郡司馬光謹致祭于亡友雷君道矩之靈
嗚呼道矩氣厚以和行直且方謹畏禮律如循鋒銚臨
義敢決若揮于將無位於朝憂國遑遑發憤抗言忠鯁
激印遠慮萬世引之深長家聲不墮煜然有光西戎驕

傅家集卷八十 祭文

五

貪蠶食我疆策馬徑前挺身戰場敷陳直辭逆折豺狼
虜氣方沮斂蹤退藏如何不淑罹此疾歿微息垂盡遺
音琅琅上嗟王事未畢而亡下痛老母皤然在堂言終
而絕云誰不傷嗚呼道矩短長有時不可推移善惡得
失繫人施爲顯晦窮通云胡可期立身如此可以無悲
獨我友生煩冤涕洟恨此膏澤不霑蒸黎莫以薦誠魂
乎有知嗚呼哀哉尚饗

祭江鄰幾文

嗚呼佗人之生憎愛糾紛獨君不然見之者親佗人之
死讖論交集獨君不然聞之者泣問君何修乃能致此
卒其誠心無有表裏是宜胡考光大顯融如何不淑星

未五終平日之遊晨往夕來宛其在目誰能不哀念君
素懷於物何有叙茲永違無若卮酒尚饗

三司祭張元常文

惟君寬裕敦篤外和内直秀眉廣額盛氣揚休吉德之
報宜蒙遐福骨相之符必享永年如何一朝兩違所望
凡在僚友孰不惋傷真以薦誠庶幾來饗

初除待制祭先公文

光聞祿不及親古人所歎重茵列鼎適足增悲光弱冠
之初幸塵仕籍罪多福鮮繼招凶釁顧復之恩闕焉靡
報痛毒愁辛無忘夙夜誠不自意蒙荷餘休名參侍從
身踐世職不肖之質何以似續慙忤戰兢不遑啓處甘
旨之養已無所展忠直之風庶幾不墜力自黽勉無忝
所生備位諫臣不敢自遠瞻望邱壟涕泗交橫尚饗

祭龐穎公文

維嘉祐八年五月丁巳具官司馬光謹以清酌庶羞之
奠躬薦于故相國贈司空侍中穎公之靈公茂德豐功
布於四海事存石刻不敢重陳念昔先人久同僚寀越
自童龀得侍坐隅撫首提攜愛均子姓甫勝冠弁遽喪
所天孤苦蠢愚不能自立長號四望誰復顧哀惟公眷
憐過於平日旣釋纒服還齒簪裾舉首朝端繫公是賴
爰加振拔俾出泥塗讎校祕文討論前載逮公出牧兩
託後車推心不疑言皆見納立效甚寡爲負實多過若

邱山咸加掩覆善如絲粟必見褒揚屢薦其名徹聞天
聽遂塵清貫獲備邇臣今日所蒙莫非公力言念恩紀
終身敢忘承乏諫垣造請有禁不親杖屨殆將再暮豈
意一朝忽爲永訣儀刑在目訓誨如聞奄去華堂長歸
幽壤心焉隕絕言不成章英靈有知臨此薄酌嗚呼哀
哉尚饗

告題祭版文

治平四年十月辛酉曾孫具官光敢昭告于曾祖考處
士府君曾祖妣夫人伏以春秋祭祀思慕無窮宜有屏
攝以伸瞻奉謹以良月吉日恭題祭版伏惟尊靈降監
昭格是憑是依尚饗

祭張尚書文

傳家集卷八十

祭文

七

維熙寧四年月日女壻具官司馬光謹以清酌庶羞祭
于故禮部尚書張公之靈公之德業衆所尊仰始終詳
實已載銘文在昔先公與公同省間來問訊延就中堂
光時弁髦立侍左右蒙公一見許以成人不卜不謀遂
妻以子自惟童駿齒位殊絕未嘗交語從何辱知知已
之恩重於姻戚沒身銜戢不敢弭忘聞訃之初涕零如
雨綴於官守走哭無從遠薦醪羞用辭爲侑尚饗

祭呂獻可文

熙寧四年作

嗚呼獻可之亡海內嘆惜况於親友惋傷可知忠直敢
言人人自許誰如獻可始末無虧道不愧心名高於世

壽夭不揆餘復何言知我之深見於臨沒今茲永訣文不逮情嗚呼哀哉尚饗

張尚書葬祭文

維熙寧四年八月日女壻具官司馬光謹以清酌庶羞祭于禮部尚書致仕清河恭安公之靈日月徂遷葬期已及承乏西臺不敢離局行不執紼奠不掇卮引領松楸悲何有極尚饗

祭錢君倚文

維熙寧六年七月己未陝郡司馬光謹致祭于君倚舍人之靈嗚呼君倚好賢如親就義若渴非聖不學唯善是爲納忠於君恥後堯舜竭力於友志追陳雷推誠而行不疑不畏屢蹈顛沛終殄悔心甲科榮名西掖清貫君倚之美茲不足言始謂古人必膺遐福如何彫謝曾未二毛我與君倚南北殊鄉哲愚異品中年相值情厚故交飾貌無華發言必盡風迹猶在精爽何之江山阻長醪羞微薄唯期惋怛可以潛通嗚呼哀哉尚饗

祭董少卿文

維年月日具位司馬光謹致祭于鄰幾少卿董兄之靈兄昔爲夏宰西鄙用師賦調雖煩民不告病生齒雖衆訟庭常虛光贊夏民目所親睹自兄之去繼者爲誰三十年餘屈指無幾兄入佐會計出奉簡書歷守列藩所至稱治民懷其惠吏畏其明爲時材臣屢當劇任指顧

立辦不廢笑談與人遊居雍容愷悌引年據禮納祿辭榮志力精強謂宜遐壽如何不淑奄忽長歸光既舊且親荷知爲厚聞訃哀惋殆不自勝薄致醪羞維誠是薦尚饗

祭張密學文

惟公幼而孝長而謹以文學從仕以勤力當官入侍禁嚴舉處臺省出敷惠化周流藩宣將漕則蓄積豐衍監邊則民夷懷服慮無微而不臻職無煩而不舉朝倚器幹時推精力壽考而終福祿流厚今茲自宋遷周捨卑就燥卜宅得吉祖載及期光等早廁賓客之末晚陪嗣子之遊式陳醪羞用薦衷素尚饗

傳家集卷八十 祭文

九

祭陳彥升文

年月日涑水司馬光謹以香酒膳羞致祭于彥升之靈嗚呼光平生取友以道相親如彥升之質直光所心服忽焉弃我惋痛誠深尚饗

奠李夫人文

元豐七年十月乙酉具官司馬光謹遣男某官某致祭奠于故李尚書夫人之靈夫人明智而溫柔順而正知古不泥從俗不流禮刑閨門名播鄉曲神明保佑壽考令終光忝預族姻素服懿德敢陳薄酌式薦微誠尚饗

改葬先令公啓殯祭文

以下爲
丞相作

某豐惡不天福祐單薄旨甘甫備風樹永違日月賈遷

松檟未植夙興夜處心不遑寧是用物土之良諏時之
吉改卜宅兆恭啓攢塗屬以備位宰司任隆責大懇祈
退避恩指莫從不得臨穴盡哀憑棺取訣永言罪負墮
絕復蘇叩心長號五内糜涕

令公祖奠文

日月有期靈輻將進遠違故壤遷就佳城惟靈澹泊安
閒以時就道山川無隄徒御不驚瞻慕攀號心摧氣結
令公到墓祭文

闕塞之陽伊川之涘地形爽塏水脈厚深惟靈去故就
新永寧茲宅不騫不圯保固億年涕慕之心昊天罔極
令公掩塋祭文

齊文集卷八十一祭文

嗚呼祿不逮親古人所嘆重茵列鼎誰適為榮掩坎聚
墳身不親在羨門旣鍵長夜無晨瞻望題和於茲永絕
興言念此心爽飛颺觸地號天肝腸寸絕

貞外啓殯祭文

惟靈居家孝慈莅官肅給如何茂德不享遐年爰擇令
辰肇開旅肆遷就祖域永有依歸沃酌不親倍增悲涕
尚饗

貞外掩壙祭文

日吉時良已就安宅祖禰咸在如從遠歸英靈有知足
慰冥漠終古永訣臨風涕洟尚饗

涇川郡夫人焚黃祭文

夫人曾自德門無祿蚤世久同困約不與顯榮朝推恩
渥追錫嘉命魚軒翟茀燭耀重泉靈而有知歆戴天寵
尚饗

啓殯祭文

旅宦飄飄家無常所櫓櫓未瘞久寓西郊逢時之良遷
就窀穸撤攢云始取道有期撫事悵然益增感悼

祖奠祭文

日月有期輶輿當發川塗寢邈邱壠長歸伉儷之心曷
勝悲悅

